



Clypevs Theologiæ Thomisticæ

Continens Tractatus de Beatitudine, de Actibus humanis, eorumque
Moralitate; de Virtutibus ac Donis, de Vitiis ac Peccatis, & de Legibus,
nec-non Dissertationem Theologicam de Probabilitate

Gonet, Jean-Baptiste

Parisiis, 1669

Disp. V. De proprietatibus virtutum

[urn:nbn:de:hbz:466:1-77355](#)

cultas reducitur ad virtutes morales infusas, quæ sunt circa passiones, quales sunt fortitudo, & temperantia, & aliæ virtutes eis annexæ. Ratio verò dubitandi est, quia virtutes morales infusæ sunt supernaturales quoad substantiam: Sed virtutes supernaturales quoad substantiam non videntur posse subjectari in appetitu sensitivo; quia quod in eo recipitur debet esse materiale, virtutes autem supernaturales immateriales sunt, cùm supernaturalitas sit supra totum genus corporeum, & omnia hujus generis accidentia: Ergo virtutes morales infusæ, quæ sunt circa passiones, non possunt subjectari in appetitu sensitivo. Nihilominus

Dico, virtutes morales infusæ, quæ versantur circa passiones, ut fortitudinem & temperantiam, cum earum partibus, in appetitu sensitivo, non verò in voluntate subjectari. Ita expressè docet D. Thomas variis in locis: nam infra qu. 85. art. 3. assignans subjectum omnium virtutum moralium, quæ erant in statu iustitiae originalis, ac proinde tam supernaturalem quam naturalium, sic ait: *Sunt autem quatuor potentie anima, que possunt esse subjecta virtutum, scilicet ratio in qua est prudens, voluntas in qua est iustitia, irascibilis in qua est fortitudo, concupisibilis, in qua est temperantia.* Idem docet quæst. de virtutibus art. 10. ad 11. ubi dicit quod fortitudo & temperantia, virtutes infusæ, sunt in appetitu sensitivo. Cùm enim sibi objectet, virtutem infusam ex Augustino esse bonam mentis qualitatem, ac proinde debere subjectari in parte rationali, sic respondet: *Irascibilis & concupisibilis, accipiunt nomen rationis, vel rationalis, in quantum participant aliquid rationem, in quantum obediunt ei: Illa ergo secundum eundem modum accipiunt nomen mentis, prout obediunt menti, ut verum sit quod Augustinus dicit, quod virus infusæ est bona qualitas mentis.* Igitur manifestum est, juxta D. Thomam doctrinam, fortitudinem & temperantiam infusam, in appetitu irascibili & concupisci subjectati.

Ratio etiam id suadet: In ea enim potentia subiectantur virtutes, cujus sunt actus proprii illarum; nam virtutes dantur potentiae operatice, quando non est naturaliter rectificata, in ordine ad proprios actus, seu ut tales actus ab ea procedant omnino perfecti: Sed actus virtutum moralium infusarum, quæ versantur per se primò circa passiones, sunt actus proprii appetitus sensitivi, cùm sint passiones moderate talis appetitus secundum prudentiam infusam, ut moderata audacia, moderatus timor &c. hæc quippe passiones moderate ex motivo supernaturali, ac ita rectificata in ordine gratia, sunt actus virtutum moralium infusarum; moderata verò ex motivo naturali, ac ita rectificata tantum in ordine naturæ, sunt actus virtutum moralium acquisitarum: Ergo virtutes morales infusæ, quæ versantur per se primò circa passiones, ut fortitudo, & temperantia, cum earum partibus, subiectantur in appetitu sensitivo.

Ad rationem verò dubitandi, initio proposita, dupliciter responderi potest: Primò cum Salmanticensibus, virtutes morales infusæ esse corporeas, subindeque in appetitu sensitivo posse subjectari. Nec obstat quod virtutes illa sint supernaturales; corporeum enim non excluditur secundum se totum à ratione supernaturalitatis, ut patet in modo presenti corporis

Christi ad species sacramentales, qui est verò corporeus, utpote receptus in corpore, & ab eo dependens, & tamen nullus dicere audebit modum illum esse naturalem. Similiter unio quæ tale corpus in triduo mortis mansit Verbo hypostaticè unitum, prout ex parte corporis se tenebat, fuit quid corporeum, propter similem rationem dependentiæ à corpore; & tamen, cùm esset ordinis hypostatici, non solùm ordinem naturali, sed etiam gratiæ excedebat: Igitur propter solam corporeitatem non debet aliquid à supernaturali ordine excludi. Neque etiam est contra rationem rei corporæ, excedere in perfectione aliquam rem spiritualem: quia licet spirituale ex parte subjecti corporeum excedat, istud tamen per ordinem ad terminum, vel objectum quod respicit, ita dignificari, & elevari potest, ut simpliciter sit nobilis, nullique creata vel creabilis substantiæ debeat, in quo ratio supernaturalitatis constituit.

Hæc solutio & doctrina probabilitate non caret: plures tamen patitur difficultates & instantias, ex eo præsentim quod virtutes infusæ sint proprietates gratiæ sanctificantis, subindeque ejus naturam sapere debeant; unde cùm gratia sit qualitas immaterialis & spiritualis quoad substantiam, idem de virtutibus infusis videtur dicendum. Quare

Secundò, & fortè melius responderet, virtutes infusæ appetitu sensitivo esse formaliter immateriales, & corporeas tantum eminentes, & ut quo. Sicut enim anima rationalis est formaliter spiritualis, & simul corporeæ ut quo, & virtualiter, quia substantiatione altiori confert effectum formalem corporæ: ita similiter, quia virtutes infusæ appetitu sensitivo, sub eminentiori ratione participationis divinae supernaturalitatis cōferunt suum effectum formale, qui quantum ad aliquid non excedit proportionem virtutis corporæ (scilicet inclinare ad medium in passionibus; ad quod inclinant etiam virtutes acquisitæ, quamvis longè diverso modo, quia istæ ad illud ut naturale pure, virtutes verò infusæ ad idem ut supernaturale inclinant) sunt formaliter immateriales, & simul corporeæ virtualiter, & ut quo: unde quæ spirituales formaliter, dicunt habitudinem ad prædictum medium, ut supernaturale & proportionatum fini ultimo supernaturali; quatenus verò corporeæ ut quo, respiciunt potentiam corporæ, eamque perficiunt in ordine ad illud quod pertinet ad objectum proprium ipsius, & in appetitu sensitivo subiectantur: sicut anima rationalis, ex eo quod est corporeæ ut quo, & virtualiter, dicit habitudinem ad materiali, tanquam ad proprium subjectum informationis, quamvis ab ea non dependeat, secundum suum esse, ex eo quod est subsistens.

DISPV TATIO V.

De proprietatibus virtutum.

Ad quæst. 64. & tres sequentes.

QVATVOR hic explicat D. Thomas virum proprietas. Prima est, quod consistunt in medio: secunda, quod sunt in

ter se connexæ: tertia, quod sunt inæquales: quarta, quod durant post hanc viam. De his quatuor proprietatibus, breviter in hac disputatione differendum est.

ARTICVLVS PRIMVS.

Vrum virtutes consistant in medio?

NO T A N D V M primò, seu potius recolendum ex dictis supra disp. 3. tria esse genera virtutum: aliae enim sunt morales, aliae intellectuales, aliae theologicae: unde ad plenam resolutionem difficultatis propositæ discutendum est, an omnes illæ virtutes consistant in medio?

2. Notandum secundò, duplex medium à Theologis solere distingui in virtutibus, unum rei, & alterum rationis. Medium rationis appellatur illud, quod non est ex natura rei fixum, determinatum, & unum pro omnibus hominibus, & pro omni tempore, loco, aliisque circumstantiis, sed variatur pro loco, tempore, & persona; diciturque medium rationis, non quia non sit ipsarum rerum, sed quia pensatis omnibus debet prudentis arbitrio definiri. Medium vero rei dicitur illud quod ita est ex natura rei determinatum & fixum, ut sit semper unum & indivisibile, nec varietur pro loco, tempore, aut persona.

Dico primò, virtutes omnes morales consistere in medio. Ita communiter Philosophi, Theologi, & SS. Patres, qui passim docent virtutem in medio seu mediocritate consistere. Unde Plato, ut est apud Apuleium libro de Philosophia, virtutes, & summitates vocabat, & medietates: summitates quidem, quod vitiorum ordini è regione opposite, longè emineant: medietates autem, quod in meditullo quodam vitiorum sint sita. Theagenes vero Pithagoræus libro de virtutibus, præter cetera in hanc rem insignia, diserte tradit virtutem nihil aliud esse, quam habitum ejus quod decorum est: decorum autem esse ait, quod neque excedit, neque deficit, sed est in medio situm. Ei concinit Isidorus Pelushota lib. 3. epist. 131. ubi hæc scribit: *Vi corpore & pulchritudinis norma, membrorum apta proportione est; ita etiam extrema spiritualis pulchritudinis linea in virtutum mediocritate consistit.* Nam si extremitates, ut quidam sapientes viri pronunciariunt, in virtutum degenerant (cupiens enim quispiam probus rei familiaris dispensator esse, in tenacitatem & avaritiam labitur; cupiens liberalis esse, in prodigalitatem cadit; unde etiam virtutes medioritates esse definiverunt; inter superstitionem enim & impietatem medium locum obiinet pietas) haud abs re Sapiens quoque monuit, *Noli esse justus multum.*

A stipulatur etiam S. Bernardus lib. 5. de confid. cap. 8. ubi laudato illo Philosophi effato, *Ne quid nimis, subdit, hoc meditullitum, omnium quadammodo intimam vim, & vitam esse ac medullam virtutum. Quid enim (inquit) tam justitia, quam modus? Alioquin si quid extra modum reliquit, non plane cuique tribuit quod suum est, quod tamen suum ipsius est facere. Quid tam rursum temperantia, qua non aliunde perfecta temperantia est, nisi quod nihil immoderatum admittit? Sed puto fatebatur etiam non minus esse fortitudinis, cum vel maxime ipsa sit,*

A qua ab irruentibus vitiis, & quasi hinc inde sif- focare conantibus, purum illud potenter eruit, & vindicat in quoddam stabile fundamentum boni, sedemque virtutis.

Eodem spectat elegans virtutis comparatio cum circulo, quam instituit S. Augustinus lib. de quantitate animæ cap. 16. quod nimis sicut torus circulus æqualiter se debet habere ad medium, sive ad centrum; ita & virtus ad suum medium, adeò ut nulla ex parte aliquid minus eveniat. Eadem comparatione utitur Aristoteles 2. Ethic. cap. 9. ubi ait quod sicut circuli medium deprehendere, non cujuslibet, sed scientis foliummodo est; sic quoque & irasci, & dare pecuniam, & sumptus facere, cujuslibet est, & facile. At cui, & quantum, & quando, & cujus causâ, & quomodo oporteat eadem hæc facere, non cujuslibet, neque facile est.

Demum Cyprianus carmine ad Senatorem apostatam, ad eandem veritatem declarandam nonnulla adducit exempla, quibus excessum, & quidquid à medio exorbitat, nocivum & vitandum; subindeque moderamen, amabile, ac per utilitatem ostendit.

*Omne quod est nimis, contra cedit: unum ope- rantur
Et calor & frigus; sic hoc, sic illud adurit;
Sic tenebre visum, sic sol contrarius auferit.
Et pariter ledunt gelidum fervensque lavacrum.
Eficaciter corpus, corpus corruptitur esca.
Vimque suam minuit, si quid protenditur ultra.
Me Dea sic docuit, MODERAMEN AMABILE
dixit.*

Ratio etiam suffragatur: Nam ut discurreit D. Thomas hic qu. 64. art. 1. Virtus moralis constituitur per conformitatem ad regulam rationis: Sed virtus quæ per conformitatem ad regulam rationis constituitur, consistit in medio: Ergo & virtus moralis. Major pater, Minor probatur. Regula rationis quandam constituit mensuram in objecto, à qua mensura recessunt duo extrema, unum per excessum, seu per abundantiam & exorbitiam, aliud per defectum, vel ut loquitur Aristoteles, per nimium & parum: Ergo virtus, quæ per conformitatem ad regulam rationis constituitur, consistit in medio; quia versatur circa objectum medium inter duo extrema, excessum scilicet & defectum. Quod ut magis explicitur,

Observandum est cum Cajetano, virtuti posse dupliciter medium assignari: Primò ex parte ipsius virtutis, ut cùm mediat inter duo virtutia, extremitate opposita, alterum per excessum, alterum per defectum; sicut temperantia inter luxuriam & insensibilitatem, humilitas inter pusillanimitatem & superbiam, fortitudo inter audaciam & timiditatem; & hoc appellat Cajetanus consistere in medio essentialiter. Secundò ex parte actus & objecti, quia inclinat ad actum commensuratum & ad aquatum regulæ rationis: nam quia inter excessum & defectum ab aliqua mensura medium est æqualitas, omnis actus commensuratus regula rationis dicitur in medio ipsius rationis consistere; & hoc vocat idem Author consistere in medio casualiter, quia nihil aliud est, quam virtutem causare actum, in medio rationis constitutum. Cùm ergo dicimus, omnes virtutes morales in medio consistere, non intelligitur de primo medio, sed de secundo: quia licet omnium virtutum actus debeant à ratione regulari, eique perfectè commensurari; sunt tamen

aliquæ virtutes, quæ non mediant inter duo vi-
tia extreæ opposita, unum per excessum, alte-
rum per defectum, ut de iustitia stricta & rigo-
rata docet D. Thomas in quæstione de virtuti-
bus art. 13. ad 12.

Dico secundò, omnes virtutes morales, que
sunt circa passiones, consistere in medio ratio-
nis; iustitiam verò, cum suis partibus, in medio
rei. Ita D. Thomas hic art. 2.

6. Prima pars conclusionis probatur: Medium
rationis est illud quod à ratione taxatur: Atqui
in materia passionum medium non est taxatum
ex natura rei, sed taxatur per rationem, juxta
uniuersusque dispositionem, & attentis omni-
bus circumstantiis loci, temporis &c. ut pater in
temperantia; nam medium temperantia non est
certa quantitas cibi omnibus accommodata ut
 sint temperantes; sed variatur in diversis, juxta
diversam complexionem, in modo & in eodem, pro
diversis temporibus & circumstantiis: Ergo vir-
tutes morales, quæ sunt circa passiones, ut for-
titudo & temperantia, consistunt in medio ra-
tionis.

7. Secunda etiam pars suadetur: Iustitia habet fa-
cere aequalitatem rei ad rem: Sed talis aequalitas
est medium rei, utpote cùm sit ex natura rei rei
taxata, & per comparationem rei ad rem, non au-
tem ad subiectum operans: Ergo iustitia in me-
dio rei consistit.

8. Adverte autem hanc aequalitatem esse dupli-
cem: unam scilicet quantitatem ad quantitatem;
& hanc facit iustitia commutativa, quâ redundat
v. g. centum pro centum: aliam quâ est
proportionis ad proportionem; & hæc servatur
a iustitia distributiva, quæ non dat omnibus a-
equaliter, sed unicuique juxta suam conditionem
vel meritum; ita ut tantum proportionaliter re-
cipiat miles, quantum tribanus ut tribunus; vel
si habent meritum ut olo, dentur centum partes
honorum reipublicæ, habenti meritum ut qua-
tuor, tribuantur quinquaginta.

9. Adverte etiam, quod licet iustitia ex sua spe-
ciali ratione respiciat medium rei, quia non aliud
præcisè attendit, quam aequalitatem, ex genera-
li tamen ratione virtutis moralis respicit etiam
medium rationis; cùm actus iustitiae, sicut &
aliarum virtutum moralium, debeat per pruden-
tiā & rectam rationem regulari: unde qui non
redderet debitum suo tempore, & loco, & cum
debita intentione, satisfaceret quidem præcepto,
sed non faceret actum iustitiae. In hoc ergo iusti-
tia à ceteris virtutibus moralibus differt, quod istæ
consistunt in medio rationis tantum, illa
verò in medio rationis & rei simili.

10. Dico tertio, virtutes intellectuales in suo ge-
nere consistere in medio. Est Aristotelis 2. Ethic.
cap. 6. & D. Thomas hic art. 3.

Probatur breviter: Virtus cuius objectum
mediat inter duo extrema, nempe inter excessum
& defectum, consistit in medio: Sed objectum
virtutum intellectualium mediatis inter duo ex-
rema &c. Ergo virtutes intellectuales consi-
stunt in medio. Major patet, Minor probatur.
Objectum virtutum intellectualium est verum,
quod est bonum intellectus: Sed verum mediatis
inter duo extrema, excessum scilicet & defectum;
veritas enim laeditur, sive affirmando plusquam
res habet, sive minus quam habet, seu negando
quod habet: Ergo objectum virtutum intel-
lectualium mediatis inter duo extrema, nimurum
inter excessum & defectum.

Ad majorem hujus conclusionis intelligentiam, advertendum est, hoc inter virtutes intellectuales speculativas & practicas discrimen intercedere, quod illæ habent medium rei; quia verum, quod est illarum objectum, est independens à determinatione rationis, & per conformitatem intellectus ad ipsas res constituitur: istæ vero habent medium rationis; nam medicina v. g. non semper dicitur sumendam esse portionem in
hac determinata quantitate, sed secundum comp-
lexionem infirmi.

Advertendum etiam, inter virtutes intellectua-
les, prudentiam speciali modo consistere in me-
dio: habet enim medium non solum generali ra-
tionem quâ cetera, sed etiam speciali, quatenus
ejus objectum est objectum virtutum moralium,
quod in medio consistere diximus. Unde pruden-
tia idem cum virtutibus moralibus habet me-
dium; cum hoc tamen discrimine (ut observat
D. Thomas hic art. 3.) quod medium in virtutib-
us moralibus se habet per modum regulati &
mensurati, in prudentia vero per modum regu-
lantis & mensurantis; quippe cùm illa sit virtu-
tum moralium regula & mensura.

Dico quartò, virtutes Theologicas non con-
sistere in medio per se, sed solum per accidens.
Ita D. Thomas art. 4.

Probatur breviter: Contra virtutes, quæ per
se consistunt in medio, contingit peccare dupli-
citer, nimurum per excessum, & per defectum,
ut patet in exemplis supra additis: Sed licet ali-
quis possit peccare per defectum contra vir-
tutes Theologicas, non tamen per excessum; ne-
que enim aliquis potest excedere in credendo
revelatio à Deo, vel in ejus dilectione: unde Ber-
nardus in libro de diligendo Deo, *Modus diligen-
di Deum est sine modo diligere*: & in serm. ad
Irrates de monte Dei, *In dilectione Dei non alia
discretio est, nisi ut scius ille, cùm dilexisset nos
in finem dilexit nos; sic si fieri potest, nos infinitè
diligamus eum; nam beatus vir qui in
matriis eius cupit nimis*: Ergo virtutes Theologi-
cas non consistunt in medio, per se, & ex parte
objecti.

Quod vero per accidens, & ex parte subje-
cti, medium requirant, ex eo patet, quod debemus
ferri in Deum credendo, sperando, &
amando, secundum mensuram nostræ condicio-
nis, & nostri ingenii vires; non vero nimio con-
natu, adeò ut corpus laeditur, aut nimium debili-
tetur. Unde subdit Doctor mellifluus post
verba relata: *Sed cum nullum finem vel termi-
num habere debeat devotio amanis, tamen terminos
suos, & fines, & regulas habere debet
actio operantis*. Quibus verbis aperte declarat,
quod licet charitas non pendeat per se à dicta-
mine prudentia, per accidens tamen, & quan-
tum ad exercitium, ab illo dependet, inquan-
tum prudentia dicitur hic & nunc actum illius
esse exercendum, subindeque in exercitio hu-
jus virtutis, modum aliquem ac moderamen esse
servandum.



ARTICVLVS I.

An virtutes morales in esse perfecto, habeant necessariam connexionem inter se?

¶ **D**ixi virtutes morales: Quia si sermo sit de intellectualibus, sive practicis, sive speculatibus, manifestum est non esse inter se connexas, sed posse unam sine aliis reperiri, ut scientiam sine prudenter, vel artem sine Scientia. Similiter etiam constat virtutes Theologicas non habere necessariam inter se connexionem: cum fides & spes possint esse sine charitate, ut patet in peccatore fideli. Unde Tridentinum less. 6. can. 28. *Si quis dixerit, amissam per peccatum gratiam, simul & fidem semper amitti; aut fidem qua remanet, non esse veram fidem, anathema sit.* Tota ergo difficultas ad virtutes morales devolvitur, non quidem quantum ad essentiam, aut in statu imperfecto consideratas, sed prius sunt in statu perfecto. *Quod ut magis declaretur:*

16. Advertendum est, virtutes morales posse duplíciter considerari; vel ut perfectas quantum ad statum, quando scilicet ita firmiter auctuant subjectum, ut omnibus relictitudinem impediuntibus facile posse obſistere: vel ut imperfectas, quando scilicet sunt in subiecto per modum dispositionis mobilis, nec firmam tribuant facultatem vincient impedimenta.

17. Concedunt ergo communiter Theologi cum D. Thoma hic qu. 65. art. 1. virtutes imperfectas non esse necessario ad invicem connexas. Idque experientia satis convincit, cum videamus multos esse promptos, non solum ex naturali complexione, sed etiam ex quadam affuetudine acquisita, ad opera misericordiae, qui tamen non sunt prompti ad opera castitatis. Unde præsens controversia & difficultas procedit solum de virtutibus moralibus secundum statum perfectis. Has enim Scotus, Vazquez, Lorca, Theophilus Raynaudus, & alij, negant habere inter se necessariam connexionem: affirmant verò cæteri Theologi, tam domestici, quam extranei, cum S. Thoma citato. Unde sit

S. I.

Conclusio affirmativa statuitur, & SS. Patrum testimonii illustratur.

18. **D**ico igitur, virtutes morales in esse perfecto ita esse connexas inter se, ut qui unâ carer, nullam perfectè habeat.

Hanc conclusionem passim docent SS. Patres: Ambrosius enim lib. 5. in Lucam cap. de sermone Iesu, sic ait: *Connexæ igitur sunt, concatenatae virtutes, ut quâ unam habeat, plures habere videatur.* Et lib. 1. de officiis cap. 27. *Liquet cognatas sibi esse virtutes.* Augustinus lib. 6. de Trinit. cap. 4. *Virtutes (inquit) quæ sunt in animo humano, nullo modo separantur ab invicem.* Bernardus lib. 1. de confidat. cap. 8. ait *esse suauissimum quemdam concentum, complectumque virtuum, atque alteram pendere ab altera.* Gregorius lib. 22. moral. cap. 1. circa medium, occasione virtutum Iob, quas ipse in se cap. 31. tam varias distinctim enumerat, hæc scribit: *Vna virtus sine aliis, aut omnino nulla*

A est, aut imperfecta. *Vt enim de primis quatuor virtutibus loquar, prudentia, temperantia, fortitudo, atque justitia, tanto perfecta sunt singula, quanto vicissim sibimet sunt conjunctæ: disjunctæ autem perfectæ esse nequaquam possunt: quia nec prudentia vera est, qua justa, temperans, & fortis non est; nec perfecta temperantia, qua fortis, justa, & prudens non est; nec fortitudo integra, qua prudens, temperans, & justa non est; nec vera justitia, qua prudens, fortis, & temperans non est.* Quo nihil clarius & expressius in favorem nostræ conclusionis dici potest. Demum Philo Iudeus lib. 2. de vita Moysis, illud ut vulgare effatum usurpat: *Virtutes omnes habet, qui unam habet.*

Eadem veritatem folio luminis naturalis ductu agnovere Philosophi Ethnici: Tullius enim in 2. Tusculanarum questionum, sic ait: *Si unam virtutem confessus es te non habere, nullam necessitate est te habiurum.* Et Aristoteles lib. 2. Magnorum Moralium: *Neque alia (inquit) sine prudentia virutes sunt, neque prudentia absque residuis virutibus perfecta.* Verum invicem sese coadiuvant, comitantes prudentiam. Unde 6. Ethic. cap. 5. ait temperantiam esse conservatricem prudentie, id eoque dictam *conservatricem*, quasi servatricem & salutem mentis. Et rationem ibidem reddit, cum assertit judicium quidem speculativum non perverti morum depravatione, judicium tamen practicum ad mores spectans inde sàpè corrumpi: *Illi (inquit) qui aut voluntate, aut dolore correpis est, principium statim non apparebit, neque ejus causa, atque ob id omnia eligi auge agi oportere; vitium enim ejusmodi est, ut principium corrumptat.*

Demique D. Augustinus Epist. 28. assertit omnibus Philosophis placuisse dogma de connexione & inseparabilitate virtutum, hanc eorum rationacionem proferens: *Hinc (ait) persuadent Philosophi, qui unam virtutem habuerit, habere omnes. & omnes deesse cui una defuerit, quod prudentia nec ignava, nec injusta, nec intemperans potest esse: nam si aliquid horum fuerit, prudentia non erit. Porro si prudentia tunc erit, si & fortis, & justa, & temperans sit; profecto ubi fuerit, secum habet ceteras. Sic & fortitudo imprudentis esse non potest, vel intemperans, vel injusta. Sic temperantia necesse est ut prudens, fortis, & justa sit. Sic justitia non est nisi prudens, fortis, & temperans. Ita ubi est una vera aliqua eorum, & alia similiter sunt. Vbi autem alia desunt, vera illa una non est, etiam si aliquo modo similis esse videatur.*

E Id confirmat ibidem exemplo Catilinæ, qui (ut de illo scripserunt qui nosse potuerunt) frigus, siti, famem ferre poterat, eratque patiens inedia, algoris, vigilia, supra quam cuicunque credibile est, ac per hoc & sibi & suis magna prædictus fortitudine videbatur. Sed hac fortitudo prudens non erat; mala enim pro bonis eligebat: temperans non erat; corruptelis enim turpis miseria fœdabatur: justa non erat; nam contra patriam coniuraverat. Et ideo nec fortitudo erat, sed duritia sibi (ut stultos falleret) nomen fortitudinis imponebat. Nam si fortitudo esset, non vitium sed virtus esset. Si autem virtus esset, à ceteris virtutibus tanquam inseparabilibus comitibus nunquam relinqueretur.



Eadem veritas dupli ratione suadetur.

21. **P**OTEST etiam suaderi conclusio dupli ratione. Prima sic potest proponi: Virtus in statu perfecto inclinat ad prompte & delectabiliter operandum in propria materia, ut docet Aristoteles 4. Ethic. cap. 4. Sed hoc non potest habere, nisi cum aliis virtutibus moralibus concretaatur: Ergo virtutes morales in statu perfecto habent inter se necessariam connexionem. Major est evidens, Minor vero dupli exemplo suadetur. Si enim aliquis haberet virtutem justitiae v.g. & non liberalitatis, proindeque nimis amaret pecunias, oblatâ occasione eas obtinendi, facilè inferret injuriam proximo, & non nisi cum magna difficultate redderet alteri debitum. Similiter mulier casta, sed avata, vel timida, vix poterit servare castitatem; oblatâ enim pecunia, vel occurrente mortis periculo, facilè in oppositum vitium pertrahetur; & idem dicendum de aliis.

Neque potest responderi, quod una virtus habet tollere omnia impedimenta ad recte operandum, etiam in materia sibi extranea. Si enim hoc esset verum, non esset necessaria nisi una virtus, illaque sola sufficeret ad operandum bene in quacumque materia; quia ad eandem virtutem pertinet operari in aliqua materia, & tollere impedimenta in tali materia occurrentia.

22. Secunda ratio sumitur ex D. Thoma h̄c qu. 65. art. 1. potestque in hanc formam reduci. Perfecta virtus moralis dependet à prudentia perfecta: Atqui prudentia perfecta esse non potest sine consortio omnium virtutum moralium: Ergo nec ulla virtus moralis potest esse in statu perfecto, nisi omnes alias virtutes habeat sibi annexas. Major constat ex definitione virtutis moralis: in ea enim dicitur virtutem moralem consistere in medio, juxta determinationem prudentiae; quare sicut non potest esse sine medio, ita nec sine prudentia. Unde Bernardus i. de considerat. cap. 8. *Prudentia (inquit) inter voluntates & necessitates media quasi quedam arbitra sedens, utrinque certis limitibus determinat fines, istis assignans & prebens quod sat, illis quod nimis demens.* Addo quod virtus moralis dicitur habitus electivus, id est faciens rectam electionem: Sed recta electio dependet à recto consilio & judicio, qui sunt actus prudentiae: Ergo si virtus moralis simpliciter loquendo dependeat à prudentia, perfecta virtus moralis dependebit à perfecta prudentia, juxta illud: *Sicut simpliciter ad simpliciter, ita magis ad magis.*

Minor vero suadetur: Perfectus prudentia status exigit, ut facile & prompte possit homo elicere actus prudentiae cum voluerit: Sed non potest homo facile & prompte rectum consilium & judicium (qui sunt actus prudentiae) ferre de mediis, nisi adint omnes virtutes morales: Ergo prudentia perfecta esse nequit, absque omnium virtutum moralium consortio & comitatu. Major pater, Minor probatur. Ad consilium & judicium rectum prærequisitum recta intentio, unde judicium de mediis in ordine ad malum finem non est à prudentia, sed ab astutia, vel alio vicio opposito prudentiae: Sed facere rectam intentionem finis, pertinet ad omnes virtutes morales; qualibet enim illarum habet rectificare appetitum circa finem & materiam propriam: Ergo non potest homo prompte & facile rectum judi-

A cium ferre de mediis, nisi habeat omnes virtutes morales.

Confirmatur: Rectum judicium dependet à rectitudine appetitus: Sed talis rectitudo haberi non potest sine virtutibus moralibus, est enim earum formalis effectus: Ergo neque rectum judicium. Minor est certa, Major probatur: quia unusquisque prout est effectus ad finem, sic de illo practice judicat: unde, ut suprà ex Aristotle dicebamus, licet judicium speculativum non pervertatur morum depravatione, judicium tamen practicum ad mores spectans inde sapè corruptum. Quare idem Philosophus supra laudat, temperantiam conservatricem prudentiae appellat. Hinc etiam Philosophi inter verum speculativum & practicum hoc discrimen constituant, quod illud sumitur ex conformitate ad rem cognitam; istud vero attendit præcipue ex conformitate ad appetitum finis rectum.

Ut ab hoc argumento se expedit Scotus, duplē distinguit prudentiam, unam partialem, & aliam totalem. Prudentiam partialem appellat, quæ non est respectu omnium agibilium, sed unius tantum materie, ciborum, aut venierungum: totalem vero, quæ respicit omnia agibilia, & omnium virtutum materias. Concessa igitur Majori de prima prudentia, negat secunda. Inò existimat non dari prudentiam totalem, quæ sit una simplex species, sed tota esse prudentias specie distinctas, quæ sunt virtutes morales; ita ut alia sit prudentia regulativa temperantiae, alia fortitudinis, alia justitiae; censeturque unam virtutem moralem non dependere à prudentia regulativa alterius, sed quamlibet à sola illa quæ propriam materiam moderatur. Deinde negat Minorem: quia prudentia partialis non requirit omnes morales virtutes, sed ad summum illam cuius materia est regulativa.

Vazquez vero responderet, quod quamvis unica sit prudentia, eam tamen non requirit perfecta virtus, secundum quod extendit ad materiam omnium virtutum, sed solum secundum quod se extendit ad finem & objectum hujus particularis virtutis, putat justitiam: ex quo solum haberur, prudentiam illam presupponere rectitudinem appetitus circa finem particularem, non vero circa fines omnium virtutum.

Verum utraque responsio facile potest hoc discursu convelli. Ut virtus aliqua, v.g. temperantia, insit alicui subiecto, prudentia debet illi constitutere medium, rescidendo extrema quibus per excessum vel defectum potest corrupti: Sed ad hoc non sufficit prudentia partialis: Ergo exigitur totalis. Major est certa, Minor probatur. Ut prudentia rescindat extrema quibus per excessum vel defectum possit medium virtutis temperantiae corrupti, debet judicare de praedictis extremis, eorumque habitudine quam habent inter se & cum medio: Atqui ad hoc exigitur prudentia totalis: Ergo &c. Minor probatur: Extrema quæ possunt corrumpere medium temperantiae, divagantur per omnem materiam virtutum: Ergo sola prudentia totalis potest illa attingere, seu de illis judicare. Consequens pater, Antecedens vero probatur exemplo mulieris, quæ potest à tuenda castitate, & à medio temperantiae recedere, vel ob solam delectationem, quæ est materia ipsius temperantiae; vel metu mortis, quæ est materia fortitudinis; vel propter lucrum, quæ est materia libidinitatis: Ergo extrema quæ possunt corrumpere medium

medium temperantie, divagantur per materiam cuiuslibet virtutis; & consequenter ad illa descendenda non sufficit prudentia partialis, ut ait Scotus; vel prudencia ut se extendens solum ad finem & objectum aliquius particularis virtutis, ut assertit Vazquez, sed exigitur prudencia totalis, seu ad materiam omnium virtutum extensa.

26. Confiratur: Dum prudentia imperat actus justitiae v. g. vel attendit omnia qua circumstant, ex quibus potest vitiari, vel aliqua omittit, & nihilominus imperat talem actum? Si primum, cum illae circumstantiae possint esse diversarum materiarum (ut si occurrant plures actus boni incompossibilis, v. g. solvere debetum creditori, quod pertinet ad iustitiam; parentes alere, quod spectat ad pietatem; sacrificium offerre, quod est religionis; subvenire pauperi, quod est misericordiae) oportet ut omnes eas materias attingat, seu ad illas omnes se extendat? Si secundum, tale imperium non erit actus prudentiae, sed imprudens & inconsideratum; quia imprudentia est imperare aliquem actum, non attentis circumstantiis occurrentibus, qua si attenderentur, multoties recta ratio dictaret talem actum non esse imperandum.

S. III.

Solvuntur objectiones.

27. **O**BIICIVNT in primis Adversarij varia Partium testimonia, quibus aperte docere vindicantur, virtutes morales inter se non esse connexas, sed ab invicem separabiles. In primis enim Hieronymus lib. I. contra Pelagianos introducit Critobolum interlocutorem, qui ut probet pro Pelagianis contra Atticum (qui personam Hieronymi & Catholicorum gerit) hominem vitare posse omnia peccata, hac objicit: *Et quomodo legimus, qui unam habuerit, omnes vindetur habere virtutes?* Respondet autem Atticus: *Participatione, non proprietate: necesse est enim, singuli excellant in quibusdam, & tamen hoc quod legissemus dicit, ubi scriptum sit nescio.* Cui iterum Critobolus sic ait: *Ignoras hanc esse Philosophorum sententiam?* Respondebat autem Atticus: *Sed non Apostolorum: neque enim mibi cura est, quid Aristoteles, sed quid Paulus doceat.* Augustinus etiam Epist. 29. non concedit justos & sanctos in hac vita habere omnes virtutes, sed posse dici habere alias, & alias non habere. Item Bernardus serm. 70. in Cantica, loquens de virtutibus justorum inquit: *Magnus est qui tria vel quatuor lilia adiscere potest in tanta spinarum densitate.* Demum Venerabilis Beda, relatus à D. Thoma in 3. dist. 36. qu. 1. art. 2. Sancti (inquit) magis humiliantur de virtutibus quas non habent, quam de virtutibus quas habent gloriantur.

28. Ad locum D. Hieronymi respondeo, illum solum ibi rejicere sententiam, qua docebat connexionem virtutum haberi propriis viribus, & absque participatione seu auxilio gratiae. Ibi enim impugnat errorem Pelagianorum, assertum ad bene operandum, & ad habendas virtutes omnes, hominem non indigere gratiae. Vel etiam dici potest cum Divo Thoma, loco citato, art. 1. ad 6. Hieronymum ibi solum velle sententiam de connexione virtutum non contineri expressè in Sacra Scriptura, sed in libris Philo-

A sophorum; non negare tamen illam esse veram, sed tantum non ita curandum esse de ea, ac si Apostoli eam tradidissent. Quod vero haec interpretatione legitima sit, patet ex eo quod idem S. Doctor talem sententiam expressè doceat in Epistola ad Fabiolam, de quadraginta mansionibus, circa mansionem 38. ubi inquit de virtutibus: *Habent sibi, & inter se connexæ sunt, ut qui una carnerit, omnibus careat.*

B Ad alia tria testimonia respondet S. Thomas ibidem art. 2. ad 1. ea debere intelligi de virtutibus quantum ad usum, & non quantum ad habitus: diversi enim Sancti diversimode excendunt se invicem in usibus diversarum virtutum, secundum quod de quolibet Confessore dictum est: *Non est inventus similis illi, qui conservare legendum Excelsi.* Propter hujusmodi ergo excessum ex parte usus, tribuimus cuilibet Sancto quasdam speciales virtutes, & alias negamus; non quia istis careant, sed quia in illis magis splendent. Potest etiam dici, illos SS. Patres solum ibi intendere, omnes virtutes non haberi in æquali gradu, sed alias esse magis & alias minus intenias.

C Objicies secundò cum Scoto: Quoties aliiquid subiectum est perfectibile distinctis perfectionibus partialibus, potest perfici secundum unam, tametsi non perficiatur secundum alias: unde potest Petrus habere visum, & carere auditu, scire metaphysicam, & ignorare arithmeticam, aut esse expertus in arte futoria, & rudis ac ignarus in arte pingendi: Sed homo est perfectibilis per plures virtutes morales, tanquam per diversas perfectiones partes: Ergo potest quamlibet ex illis recipere, aliis non receptis.

D Respondeo Majorem esse veram de perfectiblibus partialibus, non connexis ad invicem, ut sunt auditus & visus, & scientia ac artes, qua in objectione recensentur: falsam verò de perfectionibus partialibus connexis itter se, cujusmodi sunt virtutes morales, ut declaratum est.

E Dices: Tota definitio virtutis convenit v. g. temperantie, absque consortio fortitudinis: Et ego potest haberi sine fortitudine. Consequentia patet, Antecedens probatur. Virtus est habitus electivus in mediocritate consistens, prout prudens dictaverit: Sed temperantia est hujusmodi, sine fortitudinis consortio, ex hoc solum quod est cum prudentia circa propriam materiam: Ergo &c.

F Respondeo negando Majorem, ad cuius probationem, concessa Majori, nego Minorem: temperantia enim nequit perfectè medium rationis actingere in propria materia, nisi possit facile recindere omnia impedimenta, quæ tale medium postulant corrumperem, seu ab illo voluntatem abducere; alias mulier quæ castitatem violaret metu mortis, non peccaret contra virtutem castitatis, sed solum contra fortitudinem, atque adeò diceretur casta, licet non fortis; quod videtur absurdum. Constat autem impedimenta quæ possunt medium temperantie corrumpere, spectare non solum ad materiam illius virtutis, sed etiam ad alias, pura fortitudinem, liberalitatem &c. ut supra declaratum est; atque adeò nisi omnes aliae virtutes habeantur, temperantia nequirit promptè & firmiter impedimentis corruptilibus obsistere, sicumque medium illas servare.

G Objicies tertio: Potest homo exercere actus

- unius virtutis, non exercendo actus aliarum: Ergo & acquirere unam virtutem sine aliis. Antecedens patet, Consequentia probatur. Virtutes non acquirunt nisi per proprios actus: Ergo dum non exercentur nisi actus unius, non possunt aliae acquiri.
35. Respondio concessio Antecedente distinguendo Consequens: potest acquirere unam virtutem sine aliis, quantum ad essentiam, & in statu imperfecto, concedo: in statu perfecto, nego: statu enim perfectus virtutis non dependet solum ex actibus gigantibus essentiam virtutis, sed etiam ex consortio & comitatu aliarum, a quibus juvari debet, ut facile & prompte posse in propria materia medium rationis attingere, non solum per recessum ab his quae in propria materia possunt abducere a tali medio (ad quod sufficit ipsa virtus) sed etiam per recessum ab his quae possunt absolute & in quaunque materia abducere.
36. Dices: Si status perfectus unius virtutis dependet nedium ex frequentatione propriorum actuum, sed etiam ex comitatu & consortio aliarum virtutum, sequeretur quod dum una virtus in statu perfecto acquiritur, deberent omnes simul acquiri: Sed hoc videtur impossibile; tum quia in eodem instanti exerceri nequeunt actus omnium virtutum; tum etiam quia plures sunt virtutes, quarum actus non possunt ab aliquibus exerceri; pauper enim non potest exercere actus magnificentie, neque conjugatus actus virginatus: Ergo &c.
37. Respondeo concessio Majori, negando Minorem. Ad cuius primam probationem dicendum primò cum Cajetano, virtutes in statu perfecto simul acquiri, non simulata physica, hoc est in uno instanti, sed mortali, id est brevi spatio temporis: nam brevi tempore occurre possunt omnium vel saltet principalium actus, praesertim cum materiae morales valde inter se concretae sint, & aliae alii immisceantur.
- Secundò respondet idem Author, non esse inconveniens, ut unico actu, in virtute multorum praedictorum, simul generentur omnes virtutes inesse perfecto: nam et si talis actus elicitivè & formaliter si unius tantum virtutis, potest esse virtualiter multarum, quarum actus praecessunt: sicut ultima gutta in virtute praedictorum cavit lapidem. Imò actualiter potest idem numero actus ab omnibus principaliibus virtutibus oriri: ut si mulier eligat subito mortem, ne violent castitatem conjugalem; ille enim actus simul est fortitudinis, ratione objecti, & temperantiae atque justitiae, ratione motivi; quia propter fervandam fidem conjugi (quod pertinet ad justitiam) & sibi castitatem (quod spectat ad temperantiam) amplectitur mortis periculum, quod est proprium munus fortitudinis.
38. Ad secundam probationem dicendum, ad acquisitionem virtutis non requiri quod actus exterior illius exerceatur, sed sufficere actum internum electionis, absolutum, vel conditionatum: unde si pauper elicit actus internos conditionatos liberalitatis & magnificentie, poterit illas virtutes sibi comparare; & similiter conjugatus virtutem virginatus, quantum ad formale, quia potest habere in præparatione animi integratam conservanda propositum, si hoc sibi competet. Addo quod, cum diximus virtutes morales habere inter se necessariam connexionem, hoc intelligi debet de virtutibus
- A moralibus, quarum subjectum est capax, non verò de illis quārum est incapax: conjugatus verò qui voluptates venereas expertus est, non est capax castitatis virginalis, sed dunt: *ex conjugali*.
- Objicies quartò: Prudentia est omnino prior virtutibus moralibus: Ergo potest esse perfecta sine illis, ac proinde præcipuum nostræ sententia fundamentum corruit. Consequentia patet, Probatur Antecedens. Primo quia virtutes morales acquiruntur per actus prudentie, regulantes actus proprios ipsarum à quibus immediate producuntur. Secundo, quia virtutes morales non rectificant intentionem finis, sed electionem mediorum, virtus enim dicitur habitus electivus; intentio autem finis præcedit prudentiam & virtutem moralem; ejusque rectificativum ex parte voluntatis est synderesis, ex parte vero appetitus, est naturalis rectitudo voluntatis.
- Respondeo prudentiam non esse omnino priorem virtutibus moralibus, sed solum in esse imperfecto, & in fieri, ut loquitur Cajetanus, quatenus scilicet acquisitione virtutum moralium incipit ab ipso actu prudentie, taxante medium in eorum materiis; acquisitionis autem virtutum habitibus, & perfectè rectificato appetitu circa fines illarum, prudentia fit omnino perfecta. Ex quo patet ad primam probationem.
- Ad secundam verò dicendum virtutem moralis nedium rectificare electionem mediorum, sed etiam intentionem honestatis in propria materia cuiuslibet virtutis; quae intentio, quia est acceptio unitus præ alio, dicitur etiam electio latto modo sumpta, & virtus habitus electivus appellatur. Addo quod, dato quod virtus definitur per ordinem ad electionem strictè sumptam, implicitè tamen in ejus definitione involvitur intentio, quia ex hac semper procedit electio.

ARTICVLVS III.

Vtrum virtutes morales acquisita sint necessaria connexe cum charitate?

CERTVM est virtutes morales infusa esse. Cum charitate necessariò connexas: tum quia sunt proprietates gratia sanctificantis, ab ipsa dimanantes, & ab ea inseparabiles: tum etiam quia, ut discurret D. Thomas h̄c art. 2. virtutes morales infusa non possunt esse sine prudentia infusa, à qua diriguntur & regulantur, sicut virtutes morales acquisita diriguntur à prudentia naturali & acquisita; prudentia verò infusa non potest esse sine charitate: quia perfecta prudentia, qualis debet esse infusa, non potest dari absque perfecta rectitudine appetitus circa finem, cum non possit esse rectitudo circa media ad finem, nisi supponatur rectitudo circa ipsum finem: cum ergo sola caritas perfectè rectificet appetitum circa ultimum finem supernaturalem, ad quem ordinantur omnes virtutes morales infusa, prudentia perfecta & infusa absque charitate esse nequit.

Solum ergo difficultas & controversia est inter Theologos, an virtutes morales acquisita, necessariò sint cum charitate connexe, subindeque an sine charitate ulla vera virtus acqui-

ti aut conservati possit? Ut autem omnis æquicatio tollatur, & status hujus difficultatis, quæ, ut rectè dicunt Salmantenses, non est tam de re, quam de modo loquendi, clare percipiatur.

Diligenter adverendum est, aliud esse virtutem aliquam esse veram, & aliud esse perfectam: tunc enim virtus aliqua vera dici potest, quando habet quidquid requiritur ad ejus essentiam, & omnia prædicata essentialia sibi debita: tunc vero perfecta & virtus simpliciter appellatur, cum habet omnia ad suam perfectionem & statum connaturalem requisita. Hoc præmisso, sit

S. I.

Referuntur sententiae, & vera eligitur.

CIRCA propositam difficultatem duæ sunt extremitatæ sententiae, & alia media. Scotus enim in 3. dist. 36. qu. 1. docet non solum veras, sed etiam perfectas virtutes posse sine charitate reperiri, quamvis non sint ita perfectæ, sicut illæ quæ cum charitate reperiuntur. Iansenista vero in alio extremo positi, negant veras & propriæ dictas virtutes posse sine charitate reperiiri. Quam opinionem amplectitur etiam Joannes à S. Thoma hic disp. 7. art. 7. ubi docet virtutes acquisitas destrui quoad essentiam indirecte & consequenter ad destructionem charitatis; quia tollitur conversio ad Deum, nendum ut finem supernaturalem, sed etiam ut naturalem, sine qua nulla vera virtus subsistere potest. Pro explicatione mediae & veræ sententiae:

Dico primò, acquisiti posse veras virtutes, aut acquisitas conservari, sine charitate.

Probatur primò ex D. Thoma hic qu. 65. art. 2. in corp. ubi sic ait: *Virtutes morales, prout sunt operativa boni in ordine ad finem qui non excedit facultatem naturalem hominis, possunt per opera humana acquireti; & sic acquisita sine charitate esse possunt, sicut fuerunt in multis Gentibus. Quibus verbis utrumque asserit, & quod virtutes naturales possunt acquisiti sine charitate (quomodo fuerunt à Gentibus acquisita) & quod possunt sine charitate conservari.*

Probatur secundò: Philosophi Ethnici, ut Aristoteles, Plato, & alij, quibus nihil supernaturalium innotuit, agnoverunt veras & proprias virtutes morales, earumque essentiam & prædicata quidditativa descripserunt: Ergo virtutes morales, quantum ad suam essentiam & prædicata quidditativa, à charitate non dependent; subindeque sine illa acquiri & conservari possunt.

Probatur tertio: Nihil est quo per ablationem charitatis destruantur virtutes morales, pluribus actibus acquisiti à justo in statu gratia, quia non dependent à charitate, nisi solum quoad ordinem in finem supernaturalem, qui non est de ipsarum essentia, sed perfectio quædam eis per accidens superaddita ex vi imperij charitatis; & aliunde habitus acquisiti pluribus actibus, non destruuntur totaliter unico actu contrario: Ergo virtutes acquisiti in statu gratiae, possunt deficiente gratia adhuc remanere quoad essentiam.

Quod vero possint sine gratia & charitate acquiri, ex eo ostenditur, quod existens in peccato mortalium non semper male operatur, sed

Tom. III.

A multoties potest se bene moraliter exercere circa materias virtutum moralium, putâ moderando passiones &c. Ergo potest per hujusmodi exercitium acquirere habitus inclinantes ad similes actus, qui cum respiciant determinatè bonum, habebunt veram virtutis essentiam, quæ in hoc consistit quod sit inclinatio ad bonum determinatæ.

Dico secundò, nullam virtutem simpliciter & perfectè talem, acquiri, aut conservari posse, sine charitate.

Probatur primò: Virtus perfecta non potest esse sine perfecta prudencia: Sed perfecta prudencia non manet ablata charitate per peccatum: Ergo nec perfecta virtus. Major pater,

Minor probatur. Prudencia corruptitur per peccatum, & quamvis non destruatur totaliter per quodcumque peccatum, bene tamen ex parte, quatenus appetitus male disponit circa fines virtutum moralium, quæ malâ dispositione existente, non potest esse firmissim & rectum iudicium de agendis in omni eventu: Ergo perfecta prudencia non manet, ablata charitate per peccatum.

Probatur secundò: Perfecta virtus non stat cum facilitate ad peccandum: Sed hoc ipso quod aliquis labitur in peccatum mortale, contrahit facilitatem ad peccandum; quia ut ait Gregorius homil. II. in Ezechiel. *Peccatum quod mox per penitentiam non deletur, suo pondere trahit ad aliud: Ergo perfecta virtus sine charitate stare nequit.* Major patet: quia de ratione virtutis perfectæ est reddere opus bonum facile, peccatum vero difficile.

Confirmatur: Existens in peccato non potest in sensu composito esse dispositus ad eligendum medium in materia cuiuslibet virtutis, contra quodcumque impedimentum; cum sit conversus ad aliquid omnino contrarium alicui virtuti, nempe ad objectum peccati, & finem proximum ipsius, putâ ad delectabile tactus, aut gustus: Ergo non habet virtutem perfectam & simpliciter dicam.

Confirmatur amplius: Virtus perfecta facit habentem simpliciter bonum, ut constat ex definitione virtutis: Sed existens in peccato, & carens gratia & charitate, non potest dici simpliciter bonus: Ergo carens gratia & charitate, virtutem perfectam habere nequit.

Ex quibus intelliges, virtutes quæ possunt esse in homine peccatore, quamvis retincent essentiam virtutis, esse tamen ita imperfectas, ut virtutis nomen non mereantur; quia carent ordine ad ultimum finem, tam naturalem quam supernaturalem, saltem ex parte operantis, & habent potius statum dispositionis quam habitus, cum facilè sint mobiles à subiecto, ob pravam dispositionem appetitus; nec extenduntur ad eligendum medium in omni eventu, & contra quodcumque impedientia: quamvis, ut diximus, adhuc sint virtutes quoad essentiam, quia ex natura sua tendunt ad bonum, & aliunde postulane, quantum de se, habere statum habitus & perfectæ virtutis.

S. II.

Solvuntur objectiones.

CONTRA primam conclusionem objiciuntur, in primis Adversarij varia Patrum testimonia, quibus asseritur peccatores & infideles nulli

Xx ij

lam veram virtutem habere. In quo multis pre-
ter ceteros est Augustinus varius in locis, sed
pr&xf3fertim 4. contra Julian. cap. 3. ubi ait non
esse veras virtutes, nisi ubi est vera sapientia &
charitas Dei, & ideo non esse inter Romanos &
Graecos, qui essent veri sapientes, studiosique
censendi. Idem docet fidus ejus sectator Prosper
lib. t. de vocat. Gentium cap. 7. & sapientia alibi.
Subscibit Bernardus serm. 22. in Cantica in fi-
ne, & plures alii.

52. Ad huc facile responderetur, Augustinum, &
alios SS. Patres, nomine vere virtutis intelligere
virtutem perfectam, que hominem pro-
moveat ad vitam aeternam, sive, ut ipse loqui-
tur loco citato, qua liberandis & beatificandis
homini deserviat. Unde ibidem ait: Si ad con-
sequendam veram beatitudinem, quam nobis si-
des per Christum promisit, nihil profundit homini
virtutes, non sunt vere virtutes. Quod vero idem
S. Doctor agnoscat in peccatoribus & infidelibus
veras virtutes, id est quae retineant essen-
tiam & quidditatem virtutis, patet ex Epist. 130.
ubi ait continentiam Polemonis ad hujus vi-
tae honestatem valuisse, hoc est fuisse vere bo-
num intra gradum virtutis moralis Philosophi-
ce, & donum Dei illam appellat: negat tamen
ad futuram immortalitatem valuisse, quia de-
fuit Charitas & Religio in verum Deum. Aperte
etiam lib. de spiritu & littera cap. 27. docet Gen-
tes, etiam impia, & a veri Dei notitia ac cul-
tu extortes, quedam tamen opera edidisse,
que secundum justitiae regulam merito relleque
laudantur, ac proinde undeque bona sunt,
& verarum virtutum. De quo fuis in tractatu
de gratia.

53. Objiciunt secundò: Charitas est forma virtutis,
ut docet S. Thomas 2. 2. qu. 23. art. 8. Ergo tam impossibile est virtutibus quibusvis esse in
terum natura sine charitate, quam homini abs-
que anima rationali.

Respondeo quod quando charitas à Theologis
forma viruum appellatur, non eo sensu hoc di-
citur, quasi charitas sit aliis virtutibus essentia-
lis, vel absolutè necessaria, ut illa in suo ordi-
nate, & intra finem sibi connaturalem, sint & di-
cantur verae virtutes; hoc enim à nullo probato
Authore assertum est, & rejicitur à D. Thoma
citato in resp. ad i. sed sensus solidus est (ut idem
S. Doctor in corpore ejusdem articuli declarat)
charitatem esse formam assistentem, & intrinsecam,
quæ ceteræ virtutes in suis actionibus ad
finem ultimum diriguntur, ac veluti formantur,
accipiendo perfectionem illam extrinsecam, quæ
ipsis advenit ex eo quod referantur ad ultimum
finem hominis supernaturalem, in quem non
subvenierentur absque charitate. Nihilominus
tamen ex suo intrinseco & connaturali fine, qui
naturæ septis coëctetur, habent honestatem, &
bonitatem naturalem, supernaturalem adventitiam
substratam, sed quasi informem, eò quod denu-
detur ornamento illo insigni, quod per charita-
tem posset accedere.

54. Objiciunt tertio: Sicut scientia dependent à
principiis, ita virtutes morales à finibus: Sed im-
possibile est dari scientiam, intellectu errante
circa principia, aut ea ignorantia: Ergo etiam
impossibile est veras repertiri virtutes, si appeti-
tus non habeat rectum affectum circa finem: At-
qui existens in peccato mortali est aversus à Deo
ut fine ultimo, tam naturali, quam supernatura-
li: Ergo non potest habere veras virtutes.

Respondeo quod ut intellectus habeat veram
scientiam de aliquo objecto, non aliud requiri-
tur, quam quod sit bene dispositus circa propria
illius principia, vel ea firmiter credendo, vel
evidenter in se cognoscendo, quacumque ex-
istente dispositione circa principia communissi-
ma, quamvis sine illa non sit scientia perfecta,
sed habeat potius statum dispositionis, quam
habitūs. Similiter ut vera virtus acquiratur &
conseretur in appetitu, sufficit quod appetitus
sit bene affectus ad finem proprium ipsius virtutis,
quamvis non sit conversus ad finem ultimi-
num simplicitate; sine qua conversione virtus
non potest esse perfecta, nec mereatur simpliciter
nomen virtutis, magisque habet statum disposi-
tionis, quam habitus.

Objicis quartò contra secundam conclusio-
nem: Per unicum actum intemperantiae charitas
destrui potest, putat per unicum comestionem
caenium dicit ab Ecclesia prohibito: Sed nulla
virtus acquisita per unicum actum corruptitur,
sicut nullum vitium per unicum actum genera-
tur: Ergo virtus acquisita potest sine charitate
conservari. Unde S. Thomas infra qu. 71. art. 4.
docet unum vel alterum peccatum mortale simul
cum virtute acquisita esse posse, quamvis non
cum infusa.

Respondeo hoc argumentum probare quidem
virtutem acquisitam, quantum ad essentiam, pos-
se sine charitate subsistere, non tamen quantum
ad perfectionem & statum: quia ad hujusmodi
statum destruendum sufficit unicum peccatum
morale, cum illud sufficiat ad destruendam per-
fectionem prudentiae. Neque D. Thomas loco
citato inlinuat peccatum mortale conjungi posse
cum virtute acquisita, in statu perfecte existente,
sed duntaxat cum virtute acquisita quantum
ad essentiam. Potestque hoc declarari exem-
pli vitorum, que licet quantum ad substantiam
non destruantur unico actu contritionis, vel
charitatis, destruuntur tamen quantum ad statum
ad statum virtutis, ut docet idem S. Doctor
qu. 1. de virtut. art. 10. ad 16. his verbis: Licet
per actum unum simplicem non corruptum ha-
bitus acquisitus (scilicet secundum substantiam)
tamen actus contritionis virtute gratia habeat
quod corruptum habitum vitij: unde in eo qui
habuit habitum intemperantiae, cum contempsuerit,
non remanet cum virtute temperantiae infusa ha-
bitus intemperantiae, in ratione habitus, sed in
via corruptionis.

ARTICVLVS IV.

Quæ docet D. Thomas de equalitate &
duratione virtutum, breviter
expenduntur?

DE his proprietatis tam copiosè differit
S. Doctor hic qu. 66. & 67. ut nihil prou-
fus addendum sit, sed breviter & compendiosè
explanandum quod ille fusiori stylo & lato cala-
mo tradit.

Quantum ergo ad equalitatem virtutum qu.
66. docet quod in virtutibus quæ differunt
specie, una est major alia, secundum quod est
rationi propinquior: & quia inter virtutes mora-
les prudentia magis perficit rationem, illa aliis
virtutibus moribus præferritur; sicut visus om-

nibus externis sensibus antecellit: Unde sicut Philo visum, *Regem sensuum* appellat, ita prudencia virtutum mortalium Regina nuncupatur, propriusque ejus actus est imperium. Si autem sermo sit de virtutibus ejusdem speciei, sic nulla est major, vel minor secundum seipsum, sed solùm ratione participationis subjecti, vel majoris intentionis seu radicationis in diversis subjectis, vel etiam in eodem secundum diversa tempora. Quod si attendantur prout sunt simili connexæ in aliquo subjecto, tunc ratione participationis subjecti sunt æquales quadam æquilitate proportionis, quantum ad id quod est formale in illis, nempe constitutionem meditationis. At quantum ad id quod est materiale, nempe quantum ad inclinationem ad actum virtutis, potest esse inæqualitas: quia potest aliquis promptius esse ad actum unius virtutis, nempe iustitia, quam ad actus alterius, puta fortitudinis, iisque vel ex natura, vel ex confusione, vel etiam ex gratia dono.

Hac doctrinâ D. Thomas confutatus manet error Stoicorum, qui (ut videre est apud Tullium §. de finibus, & apud Lærtium in Zenone) virtutem ejusdem ubique statuta esse afferebant, nec intendi posse, aut remitti. Qui spectat illud Seneca Epist. 7. *Virtus non potest major aut minor fieri, unius statuta est.* Et mos: *Non intenditur virtus, idem esse dicebat Socrates veritatem & virtutem. Quomodo illa non crescit, sic nec virtus quidem. Habet numeros suos, plena est.* Rursusque paulò post: *Per suadebit sapientia unum bonum esse, quod honestum: hoc necremittit, nec intendi posse, non magis quam regulam, quæ rectum probari solet, quam si flectas, quidquid ex illa mutaveris, injuria est recti.* Idem ergo de virtute dicimus; & hac recta est, flexuram non recipit, rigida est, amplius intendi non potest.

Docet præterea S. Thomas eadem questione virtutes intellec[t]uales præminere moralibus: quia illæ perficiunt intellectum; istæ appetitum, qui est minus nobilis quam intellectus. Inter illas vero sapientiam dicit esse omnium perfectissimam: tum quia considerat objectum nobilissimum, nempe altissimam causam, quæ Deus est: tum etiam quia cum per causam judicetur de effectu, & per causam superiori de causis inferioribus, sapientia habet ferre iudicium de omnibus aliis virtutibus intellectualibus, & ejus est alias in suis fines dirigere & ordinare; unde est quasi architectonica respectu omnium.

Quia autem ex virtutibus moralibus præcelaraliis, quæ vero cedat, difficilè declarari posse affert Nazianzenus orat. 16. *Quemadmodum* (inquit) *etiam in prato quodam, plurimis & suavibus floribus referit, florem omnium pulcherrimum & fragrantissimum reperire haud facile est;* alio nimis alias alfatum & affectum ad se E ditrahente, atque ad primum cum decerpendum allidente. Nihilominus S. Doctor inter virtutes purè morales iustitiam ex eo dicit preferendam esse reliquias, quod & subjectum habeat sublimius, nempe voluntatem, cum reliqua appetitui sensiviro insideant; & objecto etiam nobili potiatur; versatur enim circa operationes ad alterum, quibus homo non in se tantum, sed etiam erga alios perficitur. Unde Aristoteles Ethic. cap. 1. *Præclarissima virtutum* (inquit) *est iustitia, & neque Hesperus, neque Lucifer in admirabilis.* Dux ex virtutibus purè morali-

A bus, quia prudentia, quam cæteris virtutibus moralibus præferendam esse diximus, nedum moralis est, sed præterea intellectualis.

Quinam vero sit ordo dignitatis inter temperantiam & fortitudinem, disceptatio est inter Philosophos. Plato enim 2. de legibus, temperantiam fortitudini præstare docet. Cui suffragari videtur Scriptura, cum ait Proverb. 16. *Qui dominatur animo suo (concupiscentiam scilicet frenando) melior est expugnatore urbium.* Unde Cyprianus libro de bono pudicitiae: *Qui hostem vicit, illo fortior fuit: sed alter qui libidinem repressit, fortior seipso fuit: qui inimicum prostravit, externum hostem percussit; qui cupiditatem repressit, hostem domesticum superavit.*

Nihilominus Aristoteles & D. Thomas fortitudinem temperantiae præferunt: nam S. Doctor hic qu. 66. art. 4. in corp. sic discurrit: *Virtus aliqua simpliciter dicitur major, secundum quod in ea meius bonum rationis reluet &c. Inter alias autem virtutes morales, quæ sunt circa passiones, tanto in unaquaque magis reluet rationis bonum, quam circa majora motus appetitus subdit rationi. Maximum autem in his quæ ad hominem pertinent, est vita, à qua omnia alia dependunt: & ideo fortitudo, quæ appetitum motum subdit rationi in his quæ ad vitam & mortem pertinent, primum locum tenet inter virtutes morales, quæ sunt circa passiones.* Unde quando Proverb. 16. dicitur: *Qui dominatur animo suo: melior est expugnatore urbium.* per dominatorem animalium, in eo divino oraculo, non incommodè intelligi potest ille qui per patientiam, fortitudinem administrat, cohibet impatiens animi motus, ne erumpant; ita ut his verbis nihil aliud significetur, quam inter munera fortitudinis patientiam præstare aggressioni: quod verum esse in tractatu de virtutibus cardinalibus ostendemus. Sic sanè eum locum intellexit S. Gregorius homil. 35. in Evang. ubi hæc scribit: *Minore est victoria urbes expugnare, quia extra sunt quæ vincuntur: majus autem est quod per patientiam vincitur, quia ipse à se animus superatur, & semetipsum sibi metipsum subicit, quando eum patientia in humilitate tolerans stravit.*

Articulo 6. ejusdem qu. 66. docet S. Thomas charitatem esse maximam inter virtutes Theologicas, quia propinquius Deum respicit quam cætera. De quo fuse in tractatu de virtutibus Thologicis.

Quantum vero ad durationem virtutum idem S. Doctor qu. 67. art. 1. docet virtutes morales acquisitas non remanere post hanc vitam, quoad ipsarum materiale: quia ibi nullus erit locus concupiscentie, & delectationibus ciborum & venerorum, quæ sunt materia temperantie; aut distributionibus, & commutationibus rerum quæ veniunt in usum præsentis vitæ, circa quas versatur iustitia: remanere tamen in Beatis, quantum ad earum formale, nempe quantum ad modum, seu ordinem rationis, quo appetitus rectificatur & conformatur rationi. Unde Augustinus 14. de Trinit. cap. 9. *Prudentia ibi erit sine ullo periculo erroris; fortitudo sine molestia tolerandorum malorum; temperantia sine repugnantia libidinum.*

Articulo 2. similiter affert virtutes intellec[t]uales post hanc vitam remanere quidem in omnibus, secundum id quod in ipsis est forma-

DISPUTATIO SEXTA

le, nimirum secundum species intelligibles in intellectu possibili servatas; non manere tamen quantum ad materiale, nempe quantum adphantasmata quibus extrahuntur per intellectum agentem: quia cognitio non fiet tunc per conversionem ad illa, sed erit alius modus intelligendi.

Articulis sequentibus docet ex virtutibus Theologicis, nec fidem, nec spem, sed duntat charitatem remanere in patria. De quo in tractatu de virtutibus Theologicis.

ratione divina, sicut dicitur Isaiae 50. Dominus aperuit mihi aurem, ego autem non contradico, retrosum non abiui.

Vocantur etiam in Scriptura perfectiones illae Spiritus Isaiae 11. Requiescerunt super eum Spiritus Domini, Spiritus sapientia & intellectus, Spiritus consilii & fortitudinis, Spiritus scientia & pietatis, & replebitum Spiritus timoris Domini. Cujus appellationis varias & egregias rationes seu congruentias adducit Joannes a S. Thoma huc disp. 18. art. 1. Prima est, quia perfectiones illa donantur a Spiritu Sancto, cui nomen Spiritus, & nomen doni tribuitur. Secunda, quia ex amore spirante & ponderante, & veluti ex spiritu cordis Dei procedunt. Tertia, quia quasi ipso Dei habitu inspiratur anima, que ipsis ornatur, amplectendo ipsum quasi sponsum oculantem se, & oculo oris sui spiritum ei immittente, ut perficiantur, & eleventur virtutes ad superiorum modum operandi, iuxta illud Psal. 32. *Verbo Domini celi firmati sunt, & spiritu oris ejus omnis virtus eorum.* Denique dona illa celestia Spiritus appellantur, quia his homo a Spiritu Sancto agitur moveatur, ac impellitur ad opera ardua & extraordinaria, iuxta illud Apost. ad Roman. 8. *Qui Spiritu Dei aguntur, hi filii Dei sunt.* Ubi Glossa: *Aguntur dicunt, non reguntur: plus est enim agi, quam regi: agi enim dicimus aliquem vix agentem, regi autem quasi iam aliquid agentem, qui ideo regitur ut recte agat: sed aguntur non quod nihil per se agant, sed quod ut aliquid agant, impetu gravitatem impelluntur.* His præmissis

DISPUTATIO VI.

De donis Spiritus Sancti.

Ad questionem 68. Divi Thome.

CVM dona Spiritus Sancti maximum cum virtutibus habeant cognitionem, tractatu de virtutibus subjugimus veluti appendicem, disputationem de donis Spiritus Sancti, in qua de illis tam in communione quam in particulari breviter differemus.

ARTICULUS PRIMUS.

Vitrum dona Spiritus Sancti sint habitus, & virtutibus etiam infusi distincti?

DUPPLICITER potest aliquid dici donum Spiritus Sancti: primò generali quadam ratione, quia scilicet gratis a Spiritu Sancto ut à causa efficiente procedit; & in hoc sensu omnes gratiae, & virtutes infusa possunt dici dona Spiritus Sancti: secundò speciali quadam ratione, quatenus donum importat specialem dispositionem à spiritu Sancto anima impressam, quā disponitur ad hoc ut benè & facile ab ipso ad opera extraordinaria moveatur. Dari autem in nobis hujusmodi dona seu dispositiones, constat tum ex Scriptura, Isaiae 11. Ecclesiast. 10. & 15. 1. ad Corinth. 12. & aliis scriptis, ubi fit expressa illorum donorum mentio: tum etiam ex hymno Ecclesiastico, in quo Spiritus Sanctus Septiformis munera appellatur, ipsunque his verbis Ecclesia interpellat: *Da tuis fidelibus in te confidens sacram septenarium.*

Accedit ratio D. Thomæ, qui huc art. 1. sic discurrevit: *Omne quod moveatur necesse est proportionatum est motor. & hec est perfectius mobilis inquantum est mobile, dispositio quā disponitur ad hoc quod bene moveatur a suo motore: Quantus igitur movens est altior, tanto necesse est quod mobile perfectiori dispositione ei proportionetur: sicut videmus quod perfectius oporet esse dispositum ad hoc ut altiorum doctrinam capiat à Doctore. Manifestum est autem quod virtutes humana persicunt hominem, secundum quod natus est moveri per rationem in his quae interiori vel exteriori agit: Oportet igitur inesse homini altiores perfectiones, secundum quas sit dispositus ad hoc quod divinitus moveatur; & ista perfectiones vocantur dona, non solum quia insunduntur à Deo, sed quia secundum ea homo disponitur, ut efficiatur promptè mobilis ab inspi-*

C Due circa illa dona occurunt difficultates, in titulo hujus articuli insinuate, & breviter huc discutiendæ ac resolvendæ. Prima est, an illa sint propriæ habitus? Secunda, an distinguantur a virtutibus Theologicis, & moralibus infusi?

S. I.

Duplici conclusione utraque difficultas resolvitur.

Dico primò, dona Spiritus Sancti esse propriæ habitus. Ita communiter docent Theologi cum D. Thoma huc art. 3. licet aliqui, ut refert Lorca, existimaverint hæc dona solum esse actus quosdam virtutum speciales, non habitus.

Probatur primò: Isaiae 11. dona omnia in Christo permanenter fuisse asseritur, his verbis: *Requiescat super eum Spiritus Domini, spiritus sapientia & intellectus &c. requiesceret enim permanentiam importat: Sed donum permanenter inhærens est habitus, non verò actus, vel dispositionis transiens: Ergo dona Spiritus Sancti sunt veri habitus, non verò actus, aut dispositiones transeunte.*

Probatur secundò: Anima nostra est mobilis à triplici motore, scilicet à ratione, à lumine gratiae & fidei, & à speciali impulsu & instinctu Spiritus Sancti præter communes regulas naturæ & gratiae: dispositur autem ut facilè & connaturaliter moveatur à ratione, per virtutes morales acquisitas; ut moveatur à lumine fidei & gratiae, per virtutes morales infusas: Ergo ut connaturaliter moveatur à Spiritu sancto, debet etiam per aliqua dona habitualia disponi, ac proinde dona illa debent esse veri habitus, siue virtutes morales acquisitæ & infusæ.

Confirmatur: Per dona nobis, ut ita loquar.